

MISSINGIUT

Kalaallit Nunaanni aatsitassanik piiaanermik suliaqarneq pillugu

nalunaarut nr. xx, xx 2013-imeersoq

Kalaallit Nunaanni suliffinni avatangiisit pillugit inatsimmi § 11 a, imm. 4, §13, imm. 3, § 15, imm. 2, § 29, § 33, § 35, § 37, § 39, § 49, § 56 aamma § 67, tak. inatsit pillugu nalunaarut nr. 1084, 26. oktober 2005-imeersoq inatsisikkut nr. 1382-ikkut, 23. december 2012-imeersukkut allanngortinneqartoq, tunngavigalugit makku aalajangersarneqarput:

Kapitali 1

Atuuffia

§ 1. Nalunaarummi matumani nunami makkuninnga suliaqarnerit ilaatinneqarput:

1. nunap qaani iluanilu aatsitassanik piiaaq,
2. aatsitassanik piiakkanik tunniussinissaq, imaanngitsoq aatsitassanik suliarinneqqaarneq, siunertaralugu suliarinninneq, aamma
3. aatsitassanik taaneqartunik piiaanissaq siunertaralugu ujarlerneq.

Imm. 2. Nalunaarut manna sulianut Kalaallit Nunaanni suliffinni avatangiisit pillugit inatsimmi § 2, imm. 2, nr. 2-mi aamma 3-mi pineqartunut ilaatinneqartunut sulianullu sulisitsisoq sinnerlugu suliaanngitsunut aamma atuuppoq.

Imm. 3. Taamaattorli §§-it 3-5, §§-it 9-27, § 37, §§-it 39-41, §§-it 46-53 sulisitsisoq sinnerlugu suliarineqartunut taamallaat atuupput.

§ 2. Nalunaarut manna suliat Kalaallit Nunaanni suliarineqarnerat pillugu nalunaarummi, Kalaallit Nunaanni suliffiit aaqqissuunneqarnerat pillugu nalunaarummi, Kalaallit Nunaanni teknikkikkut iluaqusersuutit aaqqissuunneqarnerat, Kalaallit Nunaanni stoffit atortussallu pillugit nalunaarummi aamma Kalaallit Nu-naani suliffinnik naliliisarneq pillugu nalunaarummi aalajangersakkanut ilassutininik imaqarpoq.

Kapitali 2

Suliffinnik naliliisarneq

§ 3. Suliat nalunaarummi matumani pineqartunut ilaatinneqartut eqqarsaatigalugit suliffimmik nalunaarut manna tunngavigalugu naliliineq makkuninnga aamma imaqassaaq:

1. Piiaaffiup iluani sumi immikkut ulorianartoqarsinnaanersoq, soorlu qaartoorsinnaaneq, ikuallattoorsinnaaneq, sullulianik nakkaattoorsinnaaneq, nakkaasoorsinnaaneq stoffinillu silaannarnilluunniit peqqissutsimut uloria-nartunik toqunartunillu akulinnik peqarfiit eqqarsaatigalugit kiisalu immikkut ulorianarsinnaasut pinaveersimatinniarlugit iliuutsit suut iliuuserineqassanersut malinneqassanersulluunniit.
2. Illersuutit annaassiniarnermilu atortut naleqquttut atorneqarnissaannik ilitsersuutit. Immikkut iliuutsitut iliuuserineqarsimasut malinneqartussalluunniit naliliinermi immikkut takuneqarsinnaassapput.
3. Suliffimmi ingerlatat immikkut ulorianaatillit qanoq ingerlanneqartarnissaannik sulinermi periaatsitut malitassat, soorlu qaartiterutissanik atuineq eqqarsaatigalugu, tamakkuninnga sulinerup

taamaallaat akuersissuteqarnikkut ingerlanneqarsinnaanerani
aalajangersagartalik.

4. Suliffiit tamarmik ataasiakkaarlutik malittarisassanik sulisut
isumannaatsuunissaat peqqissusiallu qulakkeerniarlugu aamma suleriaatsit
atortullu isumannaatsumik atorneqartarnissaat anguniarlugu
malinneqartussanik peqassapput. Malittarisassat taakku qimaaniarnermi
aqqutissanut takussutissianik, qimaaniarnermi annaasiniarnermilu atortunik
ikiueqqaarnermilu atortunik atuineq kiisalu ajornartorsiulerfimmi
suliffiulluunniit qanittuani sunik suliniuteqartoqarnissaanik
aalajangiisoqassasoq aamma annaasiniarnermik aqqissuussineq pillugit
paasissutissanik imaqqassapput.
5. Qaqqap pineqartup assinga takussutissiaq paasiuminartunngorlugu suliaq.
Takussutissiami sullulianut piiaaffiusunullu takussutissiami ilassutitut suut
ingerlatsinermut isumannaallisaaanermullu sunniuteqarsinnaasutut
ilisimaneqartut takuneqarsinnaassapput.
6. Qitiusumik silaannarissaaaveqarfiit pillugit paasissutissat kiisalu
qaartoorsinnaaneq pinaveersaartinniarlugu atortut suliniutillu
allaaserineqarnerat.
7. Silaannaq gassimik ajoqusiisinnaasumik akoqarpat akoqarsinnaappalluunniit
illersuutitut atortut tigoriaannaat sumiinnerannik pinaveersaartitsiniutinillu
sunik aalajangersaasoqarsimaneranik allaaserinninneq.
8. Ikuallattoqarsinnaanera pinaveersaartinniarlugu, sumi ikuallattoqarnera
paasiniarlugu ikuallattorlu qatserniarlugu siaruatsaaliniarlugulu suliniutit suut
suliniutigineqassanerisa allaaserineqarnerat.

Sulisitsisut arlallit akornanni suleqatigiinneq

§ 4. Suliffeqarfimmi nunamit allameersumi sulisut piiaaffimmi sulippata § 3
tunngavigalugu naliliinermut ilassummi isumannaallisaaaneq peqqissuserlu
pillugit suleqatigiinneq qanoq aqqissuunneqassanersoq
aalajangersarneqassaaq. Matumani isumannaallisaaanarluni suliniutinik
ataqatigiissaarisooqarnissaa ilanngullugu qulakkeerneqassaaq, pisariaqarpallu

sulinermi iliuuseqarnermilu ataatsimut malittarisassat
aalajangersarneqassallutik. Aammattaaq upalungaarsimanermut,
qimarnussinermut sungiusarnermullu pilersaarutit pisariaqarneratut an-
nertutigisumik ataqatigiissaarneqassapput.

Imm. 2. Ilasummi tassani suliffiup aaqqissuunneqarnera ingerlanneqarneralu pillugit paasissutissat aammattaaq ilanngunneqassapput, taamaalillutik sulisitsisut nunanit allaneersut sulinerminnik peqqussut manna aamma suliffinni avatangiisit pillugit inatsit tunngavigalugu pisussaaffitik eqqortillugit piareersaa-sinnaaqqullugit ingerlatsisinnaaqqullugillu.

§ 5. Suliffeqarfik nunamit allameersoq piiaaffimmi sulinerminik aallartitsinnginnerani § 3 tunngavigalugu naliliinerup ilai sulinermut pineqartumut attuumassuteqartut pillugit allakkatigut ilisimatinneqassaaq.

§ 6. Suliffeqarfiup namminerisaminik sulisoqanngitsup piiaaffimmini suliamik nalunaarummi matumani pineqartunut ilaatinneqartumik suliassiissuteqartup sulisitsisut sumiiffimmi tassani sulisoqartut suliffeqarfiup aaqqissuunneqarnera ingerlanneqarneralu pillugit paasissutissanik sulinerminnik peqqussut manna aamma suliffinni avatangiisit pillugit inatsit tunngavigalugu pisussaaffitik eqqortillugit ingerlatsinissaannut pisariaqartunik pissarsisinneqarnissaat isumagissavaa. Matumani taakku sulisitsisut allat suliffimmi tassani ingerlataannik ilisimatinneqarnissaat qulakkeerneqassaaq, tamanna isumannaallisaaneq peqqissuserlu pillugit suleqatigiinermut pingaaruteqarpat.

Imm. 2. Suliffeqarfiuttaaq suliffimmi tassani pissutsit isumannaatsumik sumiissusersiorsinnaanermut suliffimmilu isumannaatsumik ingerlasinnaanermut pingaaruteqartut naleqquttumik periaaseqarluni paasissutissiissutigineqarnissaat isumagissavaa, soorlu allagarsiinikkut.

Kapitali 3

Misissuinerit isumannaallisaanermillu suliaqarneq

§ 7. Sulinerup aallartinneqannginnerani pissutsit nunap sananeqaataanut, qaqqap teknikkikkut pissusianut pissutsinullu allanut suliffimmut tunngasut misissorneqassapput, sulinerup isumannaallisaanikkut peqqissutsikkullu tamakkiisumik illersorneqarsinnaasumik ingerlanneqarsinnaaneranut pisariaqartutut annertutigisumik.

Imm. 2. Assaanerup piiaanerullu aallartinneqannginneranni piiaaffiusussat portussusissaat sivingassusissaallu nunap sumiiffigisap patajaassusia kiisalu piiaariaatsit atorineqartussat eqqarsaatigalugit aalajangersarneqassapput. Issoq/-sioqqat, qaarsumernit assigisaallu sisoorsinnaasut peerneqassapput.

Imm. 3. Assatat isaariallit akuttunngitsumik misissorneqartassappt, nunap iluata patajaassuia eqqarsaatigalugu, qerattaqqusersuutillu aserfallatsaalineqassapput, isumannaallisaanerup qaffasissusissaatut pilersaarutigineqartoq attatiinnarneqarsinnaaqqullugu.

§ 8. Nunap ilua isumannaallisaatitullu siusinnerusukkut suliarineqarsimasut ingerlaavartumik misissorneqartassapput.

Imm. 2. Pissutsit immikkut ittut isumannaallisaatitut sulianut pingaaruteqartut sulisut tullianik paarlaanneranni nalunaarutigineqartassapput, allallugillu nalunaarsorneqartassallutik. Uppernarsaatit taakku sulineq ingerlajuarallartillugu suliffimmi paarineqassapput.

Nakkutilliineq attaveqatigiinnerlu

§ 9. Sulisut suliap ingerlanneqarnerani ulorianartunut illersorniarlugit suliffiit sulisitsisup taassumaluunniit toqqagataa nakkutigissavai. Nakkutilliineq inunnit pisariaqarneratut misilittagaqartunit pisinnaasaqartunillu ingerlanneqartassaaq.

Imm. 2. Inummit inummut attaveqarfiginninneq inunnilluunniit allanik allatut attaveqarfiginninneq akuttunngitsumik pisassaaq. Telekkut attaveqatigiinneq atorineqarsinnaavoq. Suliffinnik inoqartunik misissuineq akuttunerpaamik sulisut paarlaanneri tamaasa pisassaaq.

Imm. 3. Suliffiit inoqartut tamaasa angusinnaajumallugit attaveqatigiinnikkut atortut naammattut pigineqanngippata suliffiit taakku akuttunerpaamik nalunaquttap akunneri marlukkaarlugit misissorneqartassapput.

Imm. 4. Suliffik avammut matoqqasumiippat sulisumilluunniit ataasiinnarmik sulisoqarpat telekkut attaveqaat atorlugu attaveqarfiginninnissamut periarfissaqartoqarnissaa qulakkeerneqassaaq.

Imm. 5. Suliffinni tamani ikuallattoqarnerani, qaartoortoqarnerani, sullulllianik nakkaattoortoqarnerani gassinillu peqqissutsimut ulorianartunik aniasoortoqarnerani kalerrisaaarutiniq peqarnissaq sulisitsisup isumagissavaa.

Imm. 6. Telekkut attaveqaatinik ikiuineramik, qimarnussinermik annaassiniarnermillu ingerlaannavik aallartitsisinnaanermut pisariaqartunik peqarnissaq sulisitsisup isumagissavaa.

Imm. 7. Inuit kikkut nunap iluaniinnersut takananilu suatungaaniissinnaanersut sukkulluunniit ilisimaneqarnissaata ajornannginnissaa sulisitsisup isumagissavaa.

Ilinniartitsineq ilitsersuinerlu

§ 10. Sulisut tamarmik ataasiakkaarlutik qanoq atorfinitsinneqarsimanertik qanorlu sivilisutigisumik sulisimanertik apeqqutaatinnagu sulinerup isumannaallisaanikkut peqqissutsikkullu tamakkiisumik illersorneqarsinnaasumik ingerlanneqarnissaanik naammattumik naleqquttumillu ilinniartinneqarlutillu ilitsersorne-qartarnissaat sulisitsisup isumagissavaa. Suliamut atatillugu ajutoorfiusinnaasut napparsimalissutaasinnaasullu pillugit paasissutissiisoqartassaaq, matumani sulinerup aqqissuunneqarnera, suleriaatsit naleqqutut, teknikkikkut iluaqusersuutit atorneqartarnerat, ikiueqqaarnermi atortut atorneqartarnerat, inunnut ataasiakkaanut illersuutit, qimaanermi annaassiniarnermilu atortut atorneqartarnerat pissutsillu suliamut attuumasuteqartut allat pillugit paasissutissat ilanngullugit eqqarsaatigalugit. Ilinniartitsineq ilitsersuinerlu pingaartumik pisunut makkununga atatillugu pisassaaq:

a. atorfinitsitsinermi

- b. suliffiup iluani allamut nuutsitaanermi suliassalluunniit allanngortinneqarnerini
- c. teknikkikkut iluaqusersuutit atulersinneqarnerini allanngortinneqarneriniluunniit aamma
- d. teknologimik nutaamik atuilernermi.

Imm. 2. Ilinniartitsineq ilitersuinerlu taaneqartut ineriartortitsinermut naleqqussarneqassapput, matumani ulorianarsinnaasut nutaat atuutilernerat ilanngullugu eqqarsaatigalugu, pisariaqarpallu akuttunngitsumik uteqqinneqartassallutik.

Imm. 3 Ilinniartitsinermut ilitersuinernullu taaneqartunut piffissap suliffiusup iluani ingerlanneqartussanut aningaasartuutit sulisitsisup akilertassavai.

Imm. 4. Sulisut nunanit allaneersut suliffimmi suliamik ingerlataqartut pissutsit isumannaallisaanermut peqqissutsimullu tunngasut sulinerminnut sunniuteqartut pillugit naleqquttumik ilitersorneqarnissaat sulisitsisup qulakkiissavaa.

Imm. 5. Isumannaallisaanermik sulisunut ilitersuutit, matumani ajornartoornermi atortunik atuineq aamma pisuni ajornartoorfiusuni iliuusissat pillugit malittarisassat ilanngullugit eqqarsaatigalugit, allaganngorlugit pigineqarnissaat pisariaqarneratullu annertutigisumik allagarsiinikkut saqqumitinneqarnissaat su-lisitsisup isumagissavaa.

Inunnut ataasiakkaanut illersuutit

§ 11. Inunnut ataasiakkaanut illersuutitut iluaqusersuutit naleqquttut sulisunut atugassanngortinneqassapput.

Imm. 2. Illersuutitut iluaqusersuutit suliffimmiitinneqassapput, atorsinnaalluarnerallu qulakkeerniarlugu akuttunngitsumik misissorneqartassallutik.

Imm. 3. Niaquarnaveeqqutit, isumannaallisaatitut skuut atisallu mianersoqqussutitallit (sakkortuunik/ersarissunik qalipaattillit) tamatigut

atorneqartassapput, sumiffiit tamakkuninnga atuinissamut erseqqissumik pisariaqartitsiviunngitsut eqqaassanngikkaanni. Inunnut ataasiakkaanut illersuutitut iluaqusersuutit allat sulineq isumannaallisaanikkut peqqussutsikkullu tamakkiisumik illersorneqarsinnaasumik pilersaarusiorneqarsinnaanngippat, piareersarneqarsinnaanngippat ingerlanneqarsinnaanngippallu atorneqassapput.

§ 12. Nunap iluani sulinermi sulisut qaammartartumik tigummiartakkamik tamatigut nassataqartassapput. Ataavartunik qullilersuisoqarsimanngippat qaam-martartussamaat tamatigut tigorianaatinneqartassaaq.

Kapitali 4

Suliffigisaq suliffillu

§ 13. Sulisitsisup piiaffiup sumiiffimmi ingerlatat isiginiarlugit suliffiullu aaqqissorneqarnera kiisalu nalunaarummi matumani aalajangersakkat naapertorlugit illersorneqarsinnaasumik aaqqissuunneqarsimanissaa piiaffiuteqarfimmi iluani qulakkiissavaa. Matumani makku ilanngullugit qulakkeerneqassapput:

1. nunami atortut ikkussukkat pioreersut sulinerup aallartinneqannginnerani suussusersineqarnissaat misissorneqarnissaallu kiisalu pisariaqarneratut annertutigisumik isumannaallisarneqarnissaat erseqqissumillu nalunaaqutsersorneqarnissaat,
2. nunaminertami immikkut ulorianarsinnaasut sulinerup aallartinneqannginnerani suussusersineqarnissaat, nalilersorneqarnissaat pisariaqarneratullu annertutigisumik pinaveersaartinneqanisaat erseqqissumillu nalunaaqutsersorneqarnissaat,
3. teknikkikkut atortut ikkussukkat pisariaqartut pilersinneqarnissaat piffissaagallartillugulu atuiffiusunut anngutsinneqarnissaat kiisalu pisariaqarneratut annertutigisumik nakkutigineqarnissaat/misissorneqarnissaat aserfallatsaalineqarnissaallu,

4. suliffimmiinnerup sukkulluunniit pissutsit tamakkiisumik illersorneqarsinnaasut atuutsillugit pisinnaanera, matumani ingerlaarfiusut pisariaqartunik qullilersorneqarnerat ilanngullugu eqqarsaatigalugu,
5. teknikkikkut iluaqusersuutit naleqquttut pisariaqarneratut annertutigisumik atorineqarsinnaanerat,
6. piiarneqartut inissamut naleqquttumut patajaatsumik toqqaveqartumut inissinneqarsinnaanerat,
7. sumiiffiit suleriaatsinik immikkut ulorinarsinnaasunik ingerlatsiviusut ingerlatsiviunerminnut peqatigitillugu allanik suliffiusinnaannginnissaat angallaffiusinnaannginnissaallu,
8. atortulersuutit ikkussukkat, isumannaallisaanermi suliniutit, immikkut ulorianarsinnaasut il.il. ingerlaavartumik nakkutigineqarneranni periaatsimik aalajangersaasoqarsimanissaa aamma
9. upalungaarsimanissamut, qimarnussinissamut sungiusarnissamullu pilersarusiat ataqatigiissaarneqarnerisa pisariaqarpat aalajangersarneqarnissat.

§ 14. Illut/sanaartukkat, piiaanermi atortulersuutitut ikkussukkat, matumani teknikkikkut atortut ikkussukkallu allat, piiavittut sulluliat, itersaliat, usilersorfissiat assigisaallu ilanngullugit eqqarsaatigalugit, atuineq eqqarsaatigalugu illersorneqarsinnaasumik sananeqassapput aaqqissugaassallutillu kiisalu illersorneqarsinnaasumik aserfallatsaalineqassallutik.

Imm. 2. Ikuallattoqarsinnaanera allatigullu ajutoortoqarsinnaanera eqqarsaatigalugit qimaanissamut inunnillu annaassiniarnissamut illersorneqarsinnaasunik periarfissaqassaaq.

Imm. 3. Teknikkikkut atortulersuutit, iluaqusersuutit, ikkussukkat il.il. illersorneqarsinnaasumik ilineqassapput inissinneqassallutillu. Isumannaallisaanikkut peqqissutsikkullu ulorianarsinnaagunik tamanna

pissutsillu allat isiginiarlugit inissinneqassapput, taamaalillutik ajutoortoqarnerani sapingisamik ulorianannginnerpaaniassammata.

Imm. 4. Sumiiffiit nakkaattoorfiusinnaasut sunilluunniillu nakkakaasoqarfiusinnaasut ungalulerlugit, qulillugit allatulluunniit naleqquttumik iliuuseqarfigalugit isumannaallisarneqassapput.

§ 15. Matut, isaaviit, ammartartut il.il. inissinneqarneri suliap suussusia pissutsillu allat isiginiarlugit illersorneqarsinnaasuussapput. Taakku atortussanik sananeqaateqarlutik, ilusilersugaallutik aaqqissorneqarsimassapput ammarasuarneqarsinnaasunngorlugit, matugasuarneqarsinnaasunngorlugit ulorianaateqangitsumillu qaangerneqarsinnaasunngorlugit. Nipiliornermut, issimut, isugutam-mut, ikuallannermut il.il. naammaginartumik assiaqutaassapput.

§ 16. Sumiiffinni naleqquttuni aserujaatsunik pisariaqarneratut annertutigisumik allagartalersuisoqarsimassaaq, taakkulu pissutsit isumannaallisaanermut peqqissutsimillu tunngasut pillugit paasissutissiisuullutilluunniit mianersoqqussutaassallutik.

Imm. 2. Sumiiffinni immikkut ulorianartunik pisoqarfiusinnaasuni suliffik pisoqarnerani naleqquttumik kalerrisaarisinnaasunik kalerrisaarusorneqarsimassaaq, soorlu ikuallannernik malussarniutinik.

Angallannermi aqquit

§ 17. Suliffik angallaffiusussanik naammattunik sumiiffimmi tassani angallanneq akornuteqanngitsumik isumannaallisaanermut peqqissutsimillu ulorianartorsiortitsinani pisinnaanngortillugu aqqusersugaallunilu annertussusilerneqarsimassaaq, teknikkikkullu iluaqusersuutit pisariaqarneratut annertutigusumik atorneqassallutik. Suliffiit pisuni ajornartoorfiusuni pilertortumik isumannaatsumillu qimanneqarsinnaassapput.

§ 18. Angallannermi aqquit, majuartarfiit, majuartarfiusat aalajangikkat, usilersortarfiit qaqisarissallu pisinnaarnit biilertunillu ajornanngitsumik isumannaatsumillu atorneqarsinnaasunngorlugit naatsorsorneqarsimassapput, angissusilerneqarsimassallutik inissinneqassallutillu, aamma

atorneqarnissaminut naa-pertuuttunngortillugit. Sulisut angallannermi aqquiti taakkua eqqaanni suliaqartut ulorianartorsiortinneqassanngillat.

Imm. 2. Inunnut atortunilluunniit assartuinnermut angallannermi aqquiti amerlanerpaanik atuisunut suliallu suussusianut naleqquttumik angissusilerneqarsimassapput.

Imm. 3. Angallannermi aqquiti nunaminertallu nunaminertanit sanilerisaminnit qaffasinnerusunngorlugit qullarneqarsimasut naleqquttunik nakkarnaveequsersugaassapput.

Imm. 4. Pisuinnaat isaariaat minnerpaamik 1 meteritut silissuseqassaaq 2,1 meterinillu portussuseqassalluni. Tamanna ajornarpat pisuinnaat isumannaallisaaviginiarlugit immikkut iliuuseqartoqarnissaanik aalajangersaasoqassaaq.

Imm. 5. Biilnik angallannermi aqquiti matunit, isaavinnit, pisuinnaat ingerlaffissaannit, torsuusarsuarnit, majuartarfinnit assigisaannillu naammattumik ungasissuseqartumut inissinneqassapput.

Imm. 6. Biilnik sulinnermi atorneqartartunik ingerlaartoqartarpat biilertut pisuinnaallu nalinginnaasumik avissaartisimaneqassapput.

Imm. 7. Isumannaatsumik sumiissusersiorsinnaaneq angalasinnaanerlu eqqarsaatigalugit tamanna piumasaqaatigineqarpat angallannermi aqquiti nunaminertanilu angallannerup sammivii, anisarissat portussutsillu nikeriataarfigisaat erseqqissumik nalunaaqutsersorneqarsimassapput.

Imm. 8. Biilit maskinalluunniit suliffinnut isersinnaappata angallannermi malittarisassat aalajangersarneqassapput.

§ 19. Assakkani qaqisarissat angallanermilu aqquiti nunap qaanit portunerusumi inissineqarsimasut patajaatsuussapput, maskinanullu taakkunani atorneqartunut naleqquttuussallutik. Maskinat isumannaatsunik nuunneqarsinnaanngorlugit taakku sananeqarsimassapput aserfallatsaalineqassallutillu. Sivingarnit itersallu immikkat patajaatsunngorlugu suliarineqassapput.

Suliffik

§ 20. Suliffiit ataasiakkaarlutik naleqquttumik aaqqissugaassapput, ima initutigissallutik pequtit/atortut pisariaqartut, iluaqusersuutit atortussallu illersorneqarsinnaasumik akunnilerlugit inissinneqarsinnaassallutik, taamaaliornikkut ingerlatat sulinermut attuumassuteqartut tamarmik isumannaatsumik ingerlanneqarsinnaalersillugit sulinermilu inissisimanerit aalanerillu illersorneqarsinnaasumik inissalerlugit.

Imm.2. Issialluni sulineq ajornanngippat naleqquttuuppallu taamatut suliffissaq naleqquttumik aaqqissugaq pigineqassaaq. Nikorfalluni pisullunilu sulinermi ajornanngippat issiavissaqassaaq, sulinerup uninnganerani atorneqarsinnaasunik.

Imm. 3. Suliffimmut isaariaqassaaq tassanngaanniillu qimaariarfissaqassalluni illersorneqarsinnaasunik.

§ 21. Suliffik sulisut suliffimmi sulinermiluunniit ingerlatseriaatsini stoffinit atortussanillu, qinngornernit, sakortuumik kissarnernit, tipipalaanit, nipiliornernit sajukulaarnernilluunniit il.il. peqqissutsimut ajoqutasumik sunnerneqarsinnaajunnaarsillugit inissinneqarsimassallunilu aaqqissorneqarsimassaaq.

§ 22. Suliffik kusanartuullunilu torersuutinneqassaaq, pissutsit isumannaallisaanikkut peqqissutsikkullu illersorneqarsinnaajuaqqullugit. Matumani makku ilanngullugit malinneqassapput:

1. Angallannermi aqqutit nunaminertallu, teknikkikkut atortulersuutitut ikkussukkat isumannaallisaaniallunilu suliniutit illersorneqarsinnaasumik pitsaasuseqartinneqassapput,
2. atortussat, sakkuutit, ledningit il.il. sulinermi angallannermiluunniit ulorianartorsiortitsisinnaajunnaarsillugit inissinneqassapput,
3. angallannermi aqqutit nunaminertallu aamma suliffiit eqqagassanik assigisaannillu eqqaavigineqassanngillat kiisalu apinerani issilerneranilu aputaajarneqartassallutik ujaraararterneqartassallutillu, aamma

4. eqqagassat assigisaallu naleqqutumik katersorneqartassapput illersorneqarsinnaasumillu iginneqartassallutik.

Imm. 2. Torsaaaneq eqqiaanerlu ajoqusiisumik mingutsitsineq siammarneqarsinnaajunnaarsillugu ingerlanneqartassapput.

§ 23. Suliffiit matoqqasut silaannarimmik naammattumik annertussusilimmik pilersorneqassapput.

§ 24. Atortussanik tunillaassuussinnaasunik imalunniit stoffinik atortussanilluunniit isumannaallisaaneq peqqissuserluunniit eqqarsaatigalugit amermit peerasuarnissaat siaruartinneqannginnissaalluunniit pingaaruteqartunik mingutsisisoqarnissaa ulorianaateqarpat suliffiup eqqaani tamatumunnga iluaqutsersuutunik naleqquttunik naammattunillu peqassaaq, soorlu puiaasanik imermik isinut saligutaasinnaasunik imalinnik, ajornartoornermi qorlutitsivigaluni uffarfinnik immikkullu saligutunik allanik.

Imm. 2. Suliani silami sivilunerusumik ingerlanneqartartuni sulisut silap allanngorareranut illersorniarlugit pissutsit tamanna pisariaqartippassuk naammaginatsumik annertussusilimmik suliniuteqartoqassaaq, soorlu tupermik, qulisamik quimilluunniit nappaanikkut.

Imm. 3. Sumiiffimmi pineqartumi piffissami sivilunerusumi sulinermik piiaanerpiaanngitsumik ujarlernerpiaanngitsumillu ingerlatsisoqarpat, soorlu sullivimmi sulinermik, nakkutilliinermik allaffissornermillu, sulineq taamaattoq ininut aaqqissorneqarneri aalajangersimasunik suliffinnut piumasaqaatinik eqqortitsisunut inissinneqassaaq. Tamanna ininut, quinut, tupersuarnut assigisaannullu aamma atuuppoq.

Qaammaqqusersuineq

§ 25. Suliffiit kiisalu isaarissat assartuinermilu aqqutit sulisunik isumannaatsuutitsineq eqqarsaatigalugu naammattumik qaamassusilinnik qaammaqqusersugaassapput.

§ 26. Suliffiit tamanna ajornanngippat ullup qaamarnanik qaammaqquteqartinneqassapput, aammattaarlu pisariaqarneratut

qullilersugaassallutik, sulisut isumannaatsuutinneqarnissaat peqqissusiallu eqqarsaatigalugit silap pissusaanut naleqqussagaasunik.

Imm. 2. Suliffinni angallaffittullu aqqutini qulliit ikkussukkat inissinneqassapput sulisunut ajutoorutaasinnaajunnaarsillugit.

Imm.3. Suliffiit qulliit ajortinnerisigut sulisunik ulorianartorsiortitsisut naammattunik sakkortussusilinnik ajornartoornermi atugassanik qullilersugaassapput. Tamanna ajornarpat sulisut namminneq atugassaminnik qaammartartulersorneqassapput.

Kapitali 5

Teknikkikkut iluaqusersuutit atortullu innaallagissamoortut

§ 27. Silaannarissarfiit innaallagissamoortut naammattumik silaannalersuisinnaajunnaarneranni aallartittussanik kalerrisaarutilersugaassapput.

§ 28. Teknikkikkut iluaqusersuutit atortullu innaallagissamoortut gassit, pujoralak aalarluunniit pissutigalugit qaartoorfiusinnaasuni inissisimagunik sumiiffinni qaartoorfiusinnaasuni atorneqarnissaminnut naleqqussagaassapput.

Kapitali 6

Assaaneq, qillerineq il.il.

§ 29. Assaanermik, piiaanermik, qillerinermik assigisaannillu suliaqarnerit suliffinni avatangiisit pillugit inatsimmi malittarisassat nalinginnaasut nalunaarummilu matumani malittarisassat tunngavigalugit pilersaarusiorneqassapput.

Imm. 2. Suleriaatsit teknikkikkullu iluaqusersuutit naleqqutut nunap iluata pissusia pissutsillu allat atuuttut isiginiarlugit atorneqassapput, matumani sumiiffimmi tassani ingerlatat allat, nunamik immikkut ajoqusiisinnaaneq silallu sunniisarneri ilanngullugit eqqarsaatigalugit.

§ 30. Nakkaasoorsinnaaneq sulluliallu qilaavinik naakkaattoorsinnaaneq pinaveersartinneqassapput. Qulifat piiaffiillu sinaasa portussusii nunap iluata pissusianut, nunap iluata suussusianut suleriaasissatullu pilersaarutigineqartunut naleqqussarneqassapput.

Imm. 2. Assaanermik piiaanermillu suliaqarnermi nunap siunertarineqanngitsumik sisoorsinnaanerata nakkaasinnaaneralu pinaveersartinneqarnissaat qulakkeerneqassaaq. Matumani makku ilanngullugit pingaartumik isiginiarneqassapput:

1. Assaanerit sivinganerni assiaqutsersugaanngitsuni ingerlanneqartut ulorianartumik sisoorsinnaajunnaarsillugit sivingassusilerneqartassapput.
2. Ujaqqat/qaarsut seqummakui ulorinartorsiortitsinnaasut ingerlaannaq uloriananngitsumik piiarneqartassapput. Suliaq aallartinneqartinnagu aallarteqqinneqartinnaguluunniit suliffinni qulifat sivingarnillu angallanermiluunniit aqqutit atortukunik ujaqqanilluunniit ataasiakkaanik katagarnikunik peqarnersut misissorneqartassapput.
3. Assaanerit nunaminernilluunniit/ujaqqanilluunniit katagarsimasunik piianerit siunertarineqanngitsumik patajaakkunnaarsitsisinnaveersaarluni ingerlanneqassapput.
4. Assaanermik suliaqarneq naammassineqarniariartoq pilertornerpaamik qerattaqqusersuisoqassaaq, nunap iluata patajaassusiata tamanna pisariaqarunnaarsinngippagu.
5. Sumiiffiit ujaqqanik nakkutigineqarsinnaanngitsumik nakkaaviusinnaasut nakkaattoorfiusinnaasulluunniit ingerlaannaq assiaqutsersorneqassapput. Assiaqusersuutit sumiiffimmi tassani misissuilluni nakkutilliisoqareersimatinnagu pisariaqartumillu saliisoqareersimatinnagu isumannaallisaasoqareersimatinnaguluunniit peerneqassanngillat.
6. Sivinganermit assaavimmilluunniit pilertortumik qimaariariataarsinnaanermut periarfissaqartuaannassaaq.

§ 31. Itersaliorluni sulluliorlunilu qillerivinni qillerinermi kinaluunniit ulorianartoqarfiusumiissanngilaq, qillerummillu ingerlatsisoq ujaqqat tammikalaneranut illersuuserneqarsimassalluni.

Imm. 2. Qillerinermik ingerlatsinerni tamani ujaqqat pujoralaat peqqissutsimut ulorianartut sapinngisamik pilertornerpaamik piiarneqartassapput.

Kapitali 7

Nakkaasut, nakkaattoornerit il.il.

§ 32. Assaanermi piiakkanik, eqqagassatut katersukkanik, marullummik katersukkanik katersukkanillu allanik katersuiviit immertakkallu marulluiaaviit pataajaatsunngorlugit kiisalu isumannaallisaanermut peqqissutsimullu ulorianarunaarsillugit ilusilersugaassapput, sanaartorneqassallutik, ingerlanneqassallutik aserfallatsaalineqassallutillu.

§ 33. Tamana ajornangippat biilnik atortunilluunniit allanik ingerlatsisup inigisaa, aquffigisaa allatulluunniit suliffigisaa qulisaassaaq, suliffigisaa nakkutigisaanngippat nakkaasinnaasunulluunniit allatigut isumannaallisagaanngippat, su-lianilu ujaqqanik nakkaasoqarsinnaalersillugu sullulialluunniit qilaavanik nakkaattoortoqarsinnaalersillugu nunap iluani sulinermi.

§ 34. Usinik nakkaatitsivinni aalajangersimasuni assequtsiussanik pilersitsisoqassaaq, assartuutit usiminnik nakkaatitsinerminni ilanngullutik nakkaqataasinnaajunnaarsillugit.

Kapitali 8

Silaannarissaaneq

§ 35. Nunap iluanut iserfiusinnaasut tamarmik naammattumik silaannarissarfilersorneqassapput. Silaannarissarfeqarnissamik pisariaqartitsineq aamma silaannarissarfeqarfinnik ilusilersuineq sulinerup

aallartinneqannginnerani pilersaarusiorneqarlutillu
uppersaasorsorneqassapput. Silaannarissarfeqarfik angallaffiusuni
suliffiusunilu silaannaq naammaginatut pitaassuseqalersillugu
annertussusilerneqassaaq.

Imm. 2. Makku qulakkeerniarlugit ingerlaavartut naammattumillu
annertussuseqartut silaannarissaasoqarnissaa isumagineqassaaq:

- a. silaannarik,
- b. qaartoorsinnaaneq pujoralattoorsinnaanerlu pinaveersimatinnarlugit
silaannaq,
- c. suliap ingerlanneqarnerani sulinermi atukkat
naammaginatut sinnaaqullugit silaannaq, suleriaatsit atorqartut
sulisullu timikkut assortoortinneqarnerat isiginiarlugit.

Imm. 3. Silap nammineq suernerata silaannarissaanera piumasaqaatinik
eqqortitsinngippat silaannarissaaneq silaannarissarfiit innaallagissamoortut
ataaseq arlallilluunniit atorlugit qulakkeerneqassaaq.

Imm. 4. Allanngoranngitsumik ingerlaavartumillu silaannarissaaneq
anguniarlugu iliuuseqartoqassaaq. Silaannarissaasoqarfik nakkutilliinermi
kalerisaarummik atortulerlugu suliarineqassaaq, taannalu silaannarissaanerup
amigarneranik qulliit ikittaarnerisigut aamma/imaluunniit nipiliornikkut
takutitsisinnaassaaq.

Imm. 5. Ajornartoormi silaannarissarfik ingerlatsinerup
piareersarneqarnerani matusinerup tungaanut sumiiffinnut
silaannarissaasoqarfippiaap silaannaata ingerlaarfiinut toqqaannartut
atassutilinnut ingerlasussatut killilerneqassaaq. Tunisassiorfiit ajornartoormi
silaannarissarfimmik silaannarissarfilerneqarsinnaapput, sulisut
isumannaatsuunissaat peqqissusiallu qulaakkeerniarlugit naleqquttunik
ilassutaanillu iliuuseqartoqarnissaa isumagineqarsimappat.

Imm. 6. Silaannarissaasoqarfik ingerlaavartumik misissorneqartassaaq aserfallatsaalineqassallunilu. Silaannarissaatit akuttunngitsumik uuttortarneqarlutillu nalunaarsorneqartassapput.

Nunap iluani motorit orsussartortut

§ 36. Motorit orsussartortut nunap iluani atorneqartut akuttunngitsumik misissorneqartassapput pisariaqartitsinerlu naapertorlugu iluarsineqartassallutik. Misissuinerit iluarsiinerillu nalunaarsorlugit allattorneqassapput.

Imm. 2. Benzin imaluunniit gas motorinut orsussatortunut nunap iluani atorneqartunut orsutut atorneqassanngillat. Inerteqqut taanna billinut annaassiniutinut atuutinngilaq.

Gas pujoralallu peqqissutsimut ajoqutaasut qaartoorsinnaasulluunniit

§ 37. Stoffit ajoqusiisinnaasut silaannarmi katersuuppata katersuussinnaappataluunniit makku iliuuserineqarnissaat aalajangerneqassaaq:

- a. pinngorarfimminni unitsinneqarnissaat qulakkeerniarneqassaaq imaluunniit
- b. pinngorarfimminni katersorneqassapput peerneqassallutilluunniit imaluunniit
- c. stoffit taamaattut eqiterunnerat sulisunut ulorianartorsiortitsinngitsumik arrorsarneqassaaq.

Imm. 2. Ingerlatseriaatsip taamaattup stoffit ajoqusiisinnaasut sulisunut ulorianartorsiortitsinngitsumik agguataarsinnaasussaassavai.

Imm. 3. Anersaartuutinut uummarsaanermilu atortulersuutit sumiiffinni sulisut silaannarmit ajoqusiisinnaasumit sunnerneqarfigisinnaasaanni tigeriaannaatinneqassapput. Atortut taakku illersorneqarsinnaasumik toqqortarineqarlutillu aserfallatsaalineqassapput.

Imm. 4. Sulisut atortunik atuinissamut sungiusarsimasut naammattunik amerlassusillit suliffimmiissapput.

§ 38. Silaannarmi gassit pujoralaallu peqqissutsimut ajoqutaasut qaartoorsinnaasulluunniit ussissusiat naliliiffiginiarlugu iliuuseqartoqassaaq.

Imm. 2. Nakkutilliinermi atortunik sumiiffinni aalajangersimasuni gassit eqiterunnerannik nammineerluni ingerlaavartumillu nalunaarsuisartunik, kalerrisaarutunik nammineerlutik aallartittartunik, atortunut innaallagissamoortunut innaallagissap sarfaanik nammineerlutik unitsitsisartunik aamma motorinik orsutortunik nammineerlutik unitsitsisartunik ikkussuisoqassaaq.

Imm. 3. Gassit eqiteruttut ussissusiat silaannarni sumiiffinnit pīaaviup sananeqarfianneersunit aamma pīaaffimmeersunit piaaffittullu assataneersunit innaallagissamoortunik silaannarissarfeqarnissamik pinngitsuuisinnaanngiffiusunit a-niasuni ingerlaavartumik nakkutigineqassaaq.

Imm. 4. Nakkutilliinermi atortunik namminneerlutik aallartittartunik ikkussuisoqarsimappat uuttortaanermi uuttorneqartut nalunaarsorneqassapput nalunaarsukkallu toqqorneqassallutik.

§ 39. Qaartoorsinnaasunik pilersorneqarnissaa akiorniarlugu pinaveersimatinniarlugulu iliuuserisassat pisariaqartut tamarmik iliuuserineqassapput.

Imm. 2. Sumiiffinni qaartoornissamut ulorinartorsiorfiusuni silaannaap qaartoorsinnaasup ikikkarnissaa pinngitsoortinniarlugu iliuusissat pisariaqartut tamarmik iliuuserineqassapput.

Imm. 3. Qaartoornerit pujoralammik assatalluunnit gassianik qaartoorsinnaasunik pissuteqartut pujoralammillu qaartoorsinnaasumik nutaamik pilersitsisinnaasut siammarsinnaanerat qaartoornermut killiffissatut assiaqutsersuutit atorlugit killilersimaarniarneqassaaq. Assiaqutsersuutit taamaattut allagaammi akuttunngitsumik nutarterneqartartussami nalunaarsorneqarsimassapput, allagaallu taanna akuttunngitsumik nutarterneqartassaaq sulifimmilu tigoriaan-naassalluni.

§ 40. Innermik atuineq kiisalu sulinermik ikikkaasinnaasumik ingerlataqarnissaq inerteqqutaapput, ikuallattoqarsinnaanera

qaartoortoqarsinnaaneraluunniit pinaveersimatinniarlugit naammaginantumik iliuuseqartoqarsimanngippat. Su-miiffinni ikuallattoorfiusinnaasuni qaartoorfiusinnaasunilu pujortarneq inerteqqutaavoq. Nunap iluani, assatani ujaqquerivinniluunniit qaartoorsinnaasumik gasseqartuni pujoralaqartuniluunniit tupanik pujortagassanik kiisalu sunilluunniit innaallatsisinnaasunik ikummartitsisinnaasunilluunniit nassataqarnissaq inerteqqutaavoq.

§ 41. Sumiiffinni qaartoorsinnaasunik gasseqartuni pujoralaqartuniluunniit innermik supoortoq atorlugu saviminernik agguineq, svejserineq taakkuluunniit assigisaannik suliaqarneq qaqutigunnaq ingerlanneqarsinnaapput, sulisullu isumannaatsuunerat peqqissusiallu illersorniarlugit immikkut iliuuseqartoqassalluni.

Kapitali 9

Qaartiterutissat innattaatillu

§ 42. Qaartiterutissanik innattaatinillu toqqortarinninneq, assartuineq atuinerlu inunnit sulianik tamaattunik ilisimasalinnit pisariaqarneratullu akuerisaasunit isumagineqassaaq. Sulisut isumannaallisaanikkut peqqissutsikkullu ulorianartorsiortinnagit suliassat aaqqissuunneqarlutillu sularineqassapput.

Imm. 2. Piiaavinni qaartoorsinnaasumik pujoralalinni qaartiterutissat innattaatillu piiaavinnut assatanullu taamaattunut naatsorsuusat kisimik atorineqarsinnaapput.

Imm. 3. Innattaatinik innaallagissamoortunik atuinermi kallilernissaa ilimanartillugu kallerup innaallanneri pillugit pilertortumik isumannaatsumillu mianersoqqusisoqarsinnaassaaq.

Kapitali 10

Ikuallattoorsinnaaneq, qimaariarfissat, ikiueqqaarneq il.il.

§ 43. Sumiluunniit suliffiit pilersinneqarfiini, aaqqissorneqarfiini, atortulersorneqarfiini, atorineqalerfiini, ingerlatseriaatsini

aserfallatsaalineqarfiiniluunniit ikuallalersinnaaneq pinaveersimatinniarlugu siaruatsaaliniarluguluunniit iliuusissat pisariaqartut iliuuserineqassapput. Ikuallalerneq pilertortumik sukumiisumillu qaminneqarsinnaasussaassaaq.

Imm. 2. Suliffiit qatserinermi atortunik naammattunik pilersorneqarsimassapput, pisariaqarpallu ikuallannernik malussarniutunik kalerrisaarutinillu atortulersorneqarsimassallutik. Qatserinermi atortut biilini orsussamik ingerlatilinni, maskinani sulinermilu atortuni annerusuni kiisalu sumiiffimmi immikkut ikuallajasulinni qitiusumik naleqquttumillu inissinneqarsimassapput. Assammik qatserutit tigorianaassapput, pisariitsumik atorneqarsinnaassallutik illersorneqarsinnaasumillu toqqortarineqassallutik.

Imm. 3. Qatserinermi atortut sumiiffii nalunaaqutsersorneqarsimassapput. Nalunaaqutsiussat ataavartumik naleqquttumillu inissinneqassapput.

Imm. 4. Nunap iluani stoffit atortussallu ikumasinnaasut pisariaqarluinnartuinnartut annertussuseqartinneqassapput.

Imm. 5. Imerpalasut naqitsiniliuutit, tassa imaappoq imerpalasut naqitsinertut nukinngortitsisinnaasut atorneqarnissaat pisariaqarpata imerpalasut ikikkaruminaasut sapinngisamik atorneqarniassapput, ikuallattoorsinnaaneq innerullu siaruaassinnaanera pinngitsoortinniarlugit. Imerpalasut naqitsinertut nukinngortitsisinnaasut innermut akiuussinnaanermut misiliinermi piumasaqaatit immikkuualuttulersugaasut ipeersarnissarlu eqqarsatigalugu piumasaqaatit eqqortissavaat. Imerpalasut naqitsinertut nukinngortitsisinnaasut piumasaqaatinut assigiinngitsunut naapertuuttuunngitsut atorneqarpata sulii annertunerusumik iliuuseqartoqassaaq, ikuallattoorsinnaaneq innerullu siaruaassinnaanera pinngitsoortinniarlugit.

Qimaariarfissat ajornartoornermilu aniffissiat

§ 44. Sulisut ulorianartorsiornermi suliffitik sukkasuumik isumannaatsumillu qimassinnaasussaavaat. Qimaariarfissat ajornartoornermilu aniffissiat erseqqissumik nalunaaqutsersugaassapput, assersorneqaratik akornuteqanngitsumillu qaangerneqarsinnaassallutik sapinngisamillu

toqqaannartumik silamut imaluunniit immikkoortumut inimulluunniit annanniarfiusumut aniffiusinnaassallutik.

Imm. 2. Sulisut isumannaatsuunerat peqqissusiallu annertuumik ulorianartorsiortinneqarpata ingerlatsineq unitsinneqassaaq, sulisullu sumiiffimmut isumannaatsumut qimarnunneqassallutik.

§ 45. Suliap suussusia pissutsillu allat apeqqutaatillugit qimaariarfissat ajornartoornermilu aniffissiat naammattunik amerlassuseqartut suliffimmiittut tamarmik ulorianartorsiulernermi sulisut silamut sumiiffimmulluunniit isumannaallisaaviusumut isumannaatsumik anisinnaanngorlugit ilusilersorneqarsimasut, angissusilerneqarsimasut inissinneqarsimasullu pigineqassapput.

Imm. 2. Tamanna ajornanngippat nunap iluani suliffiit tamarmik immikkut marlunnik anisariaqartinneqassapput, tamarmik immikkut nunap qaanut ingerlaviusinnaasunik avissaartitanik aqutissalinnik. Anisarissat atorineqarnerat timikkut sakkortuumik assoroornermik nassataqarpat anisarissat taakku sulisut assartornissaannut iluaqusersuutini atortulersugaassapput.

Imm. 3. Tamanna isumannaallisaanermut tunngasut pissutigalugit pisariaqartinneqarpat ajornartoornermi anisarissat isaaviilluunniit matui qimaaffiup tungaanut ammartartuussapput, aamma ajornanngitsumik isumannaatsumillu matuersaat atornagu ammarneqarsinnaassallutik, kiisalu illersartunik kaajallattartunilluunniit matulernerneqarsimassanatik.

Imm. 4. Qimaariarfiit ajornartoornermilu aniffissiat qaammaqquteqartariaqartut ajornartoornermi qullernik innaallagissap sarfaarunnerani naammattumik sakkortussusilimmik qaamanilinnik pilersorneqarsimassapput.

Qimaanermi annaassiniarnermilu atortut

§ 46. Qimaanermi annaassiniarnermilu atortunik pisariaqartunik peqarnissaa taakkulu aserfallatsaalineqarnissaat sulisitsisup isumagissavaa.

imm. 2. Sulisut iliuusissanik pisuni ajornartoorfiusuni iliuuserissalugit naleqquttunik ilinniartinneqarlutillu ilitsersorneqassapput.

Imm. 3. Annaassiniarnermi atortut sumiiffinni naleqquttuni tigoriaannanngorlugit pigineqassapput, sumiiffiilu nalunaaqutsersorneqarsimassallutik. Atortut taakku aserfallatsaalineqassapput sukkulluunniillu atorneqarnissaminut piareersimassallutik.

Ikiueqqaarneq

§ 47. Ikiueqqaarnermi atortut sumiiffinni sulinermi pissutsit pisariaqalersitsiviini tamani tigoriaannaassapput.

Imm. 2. Sulisut silaannarmit peqqissutsimut ajoqutaasumit sunnerneqarsinnaappata anersaartuutunut uummarsaanermilu atortut pigineqassapput.

Imm. 3. Sulisut naammattumik amerlassusillit ikiueqqaarnermi atortut atornissaannik ilitersorneqarsimassapput.

imm. 4. Suliffiup angissusiata, suliap suussusiata ajutoorsinnaanerullu tamanna pisariaqalersippassuk init ikiueqqaarfissat ataaseq arlalilluunniit ikiueqqaarnermi atortunik atortulersukkat akiutinillu atuinissamut naleqqussarneqarsimasut aaq-qissorneqassapput.

Imm. 5. Inini taakkunani tamanit takuneqarsinnaasunik allagarsersuinikkut qanoq ikiueqqaarnissaq ilitersuutigineqassaaq.

Imm. 6. Init ikiueqqaarfiusussat erseqqissumik nalunaaqutserneqarsimassapput.

Upalungaarsimaneq

§ 48. Sulinermi ajutoortoqartillugu, ikuallattoqartillugu, qaartoortoqartillugu nakkaattoortoqartillugu il.il. upalungaarsimanissamut pilersaarutip pigineqarnissaa sulisitsisup isumagissavaa. Pilersaarut suliffinni allannguuteqartoqaraangat ingerlaavartumik nutarterneqartassaaq.

imm. 2. Upalungaarsimanissamut suliniaqatigiiffik naleqquttoq annertuumik ajutoornerni pisoqarnerniluunniit tamani iliuusissanik naleqquttunik pilertortumik sunniuteqarluartumillu toqqaasinnaasoq pilersinneqassaaq.

Imm. 3. Upalungaarsimanissamut suliniaqatigiiffik nunap iluani sumiluunniit ikiuisinnaassappat suliniaqatigiiffimmi tassani annaassiniartartut sungiusarsimasut naammattunik amerlassusillit naleqquttunillu atortullit ilaatinneqassapput.

imm. 4. Suliffinni nalinginnaasumik inuttalersugaasuni tamani upalungaarsimanisamut akuttunngitsumik sungiusartitsisoqartassaaq.

Kapitali 11

Ajutoornermik nalunaarutiginninneq

§ 49. Suliffeqarfiup suliffimmi isumannaallisaanerup peqqissutsillu naliliivigineqarnerannik suliaqartussaataasup, tak. § 3, sumiiffimmi ajunaarnermik annertuumik nassataqartumik nassataqarsinnaasimasumillu ajutoortoqarpat tamanna Suliffeqarfinnik Nakkutilliisoqarfimmut ingerlaannartumik nalunaarutigissavaa.

imm. 2. Sulisitsisut sulinermi ajutoornernik ajoqusernernillu nalunarutiginninnissamut allatigut pisussaaffiini allannguuteqartoqanngilaq.

Kapitali 12

Peqqissutsimik misissuinerit sunnerneqarsimasunillu nalunaarsuineq

§ 50. Sulisut peqqissutsikkut ajoqusiisumik sunnerneqarsimasinnaasut sulileqqinnginnerminni peqqissutsimikkut misissorneqarnissaminnut periarfissaqarnisaat, pisariaqarpallu akuttunngitsumik akuttunerpaamillu ukiut pingasukkaarlugit misissorneqartarnissaat sulisitsisup qulakkiissavaa, imatut pisoqarpat:

1. Sunniineq nappaammut suussusersineqarsinnaasumut peqqissutsilluunnit ajorseriarneranut ataneqartoq takuneqarsinnaappat,

2. nappaat sunniinerluunniit pissutsit sulisut atugaat pissutigalugit pilersinnaasoq ilimanaateqarpat,
3. misissueriaaseq atorneqartoq sulisumut annikitsuinnarmik ulorianarsinnaappaat, aamma
4. nappaat sunniulluunniit takuneqarsinnaasunngortinniarlugu teknikkit sunniuteqarluartut pigineqarpata.

Imm. 2. Misissuinerit sulisumut isertitatigut annaasaqaataanatik ajornangippallu piffissap suliffiusup nalaani ingerlanneqarsinnaanerit sulisitsisup isumagissavaa.

§ 51. Sulisut sulisitsisup allataavinni nalunaarsussavai, suliaasa suussusii qanorlu sivisutigisumik sulisimanerat kiisalu tamatumunga atatillugu stoffinit atortussanillu ulorianartunit sunnerneqarsimanerat nalunaarlugit. Suliffeqarfinnik Nakkutilliisoqarfik nakorsarlu misissuisoq allattaavinnik taakkuninnga misissuisinnaatitaapput. Sulisut inuit pillugit paasissutissanik allattaavimmi allanneqarsimasunik misissuisinnaatitaapput. Sulisut taakkulu suliffeqarfimmi sanaartorfimmiluunniit sinniisaat allattaavinni ataatsimut paasissutissanik pineqartut kinaassusiinik ilisarnarunnaarsinneqarsimasunik misissuisinnaatitaapput.

Imm. 2. Allataaviit taakku sunniinerup qaangiunnerata kingornatigut sivikinnerpaamik ukiuni 40-mi toqqortarineqassapput. Allataaviit suliffeqarfiup atorunnaarnerani najukkami Suliffeqarfinnik Nakkutilliisoqarfimmut nassiunneqassaq.

Kapitali 13

Immikkut akuersissuteqartarnej naammagittaalliorsinnaanerlu

§ 52. Suliffeqarfinnik Nakkutilliisoqarfiup pisortaata pissutsinik immikkut ittunik atuuttoqartillugu taamaaliernerlu naleqquttut tamakkiisumillu illersorneqarsinnaasutut nalilerneqarpat nalunaarummi matumani aalajangersakkat atuutinnginnissaat immikkut akuersissutigisinnaavaa.

§ 53. Nalunaarut manna tunngavigalugu aalajangiinerit Kalaallit Nunaanni suliffinni avatangiisit pillugit inatsimmi § 64 tunngavigalugu naammagittaalliuutigineqarsinnaapput.

Kapitali 14

Pinerluttulerinermik inatsit tunngavigalugu pineqaatissiinerit

§ 54. Kinaluunniit Kalaallit Nunaanni pinerluttulerinermik inatsit tunngavigalugu pineqaatissinneqarsinnaavoq

1. § 3-mik aamma §§-nik 7-imit 53-imut unioqqutitsiguni
2. nalunaarut manna tunngavigalugu peqqusissutitik inerteqqutinilluunniit malinninngikkuni imaluuniit
3. nalunaarut tunngavigalugu immikkut akuersissuteqarnermi piunasaqaatinik sumiginnaaguni.

imm. 2. § 3-mik aamma §§-nik 7-imit 53-imut unioqqutitsisoqarpas sulisitsisoq akiliisitaanissamat akisussaatinneqarsinnaavoq, unioqqutitsineq sulisitsisup piaaraluni mianersuaalliorlunuunniit unioqqutitsineratut isigineqarsinnaanngikkaluarpalluunniit. Akiliisitaanissamat akisusaassuutitsinermit pillaatip allanngortinneqannginnissaa aalajangersarneqassaaq.

imm. 3. Ingerlatseqatigiiffiit il.il. (inatsisitigut ingerlatsisut) pinerluttulerineq pillugu inatsimmi kapitali 5-imi malittarisassat tunngavigalugit pinerluttulerineq pillugu inatsiseqartitsinikkut akisussaatinneqarsinnaapput.

Kapitali 15

Atuutilersitsineq

§ 55. Nalunaarut manna 1. januar 2014-imi atuutilerpoq. Aatsitassanik paaaneq il.il. ulloq taanna sioqqullugu aallartinneqarsimappata § xx-imi aalajangersakkat aatsaat 1. januar 2015-imi atuutilissapput.

Suliffeqarfinnik Nakkutilliisoqarfik, ulloq xx.xx.2013

Jens Jensen

/ Eva Jensen